

弘

簡

錄

弘簡錄卷九十八

明刑部員外郎仁和弘齋邵經邦學

皇清翰林院侍講學士四世孫遠平校閱

天王 宋一之十五

度宗皇帝諱禛太祖十一世孫父嗣榮王與芮乃理宗同母弟  
母齊國夫人黃氏夢采衣神人擁一龍納懷中已而有娠以嘉  
熙四年四月九日生於紹興邸第祖母榮文恭王夫人全氏夢  
神言帝命汝孫非家所有嫡母錢夫人夢日照東室生時室有  
赤光稍長內蓄資慧七歲始能言輒合矩度理宗許之歲久無  
嗣乃屬意焉初名孟啓淳祐六年授貴州刺史明年進宜州觀  
察使就內小學九年除慶遠軍節度使封益國公十一年更賜  
名改封建安郡王上納程元鳳言選用重厚篤實之士以陳顯

伯爲翊善蔡抗爲贊讀翁甫爲直講立爲皇子賜今名改崇慶  
軍節度開府儀同三司進封永嘉郡王初建資善堂御製記文  
并書以賜進封忠王授與芮太師寶祐二年加元服字以邦壽  
轉抗兼翊善施退翁爲直講五年加鎮南遂安二軍節度使授  
與芮太傅判大宗正事立爲皇太子賜字長源上家教甚嚴每  
日雞初鳴問安再鳴回宮三鳴往會議所參決庶事退入講堂  
先經次史手不釋卷將哺復至榻前起居問今日所講何經答  
言是則賜坐與茶否則重爲剖析又不通則繼以怒明日更須  
覆講率以爲常崩之日遺詔卽皇帝位戊辰尊謝后爲皇太后  
庚午宰執文武詣祥曦殿表請聽政不允辛未大赦十一月壬  
申又表復辭凡經七上始允丙戌聽政初御後殿以賈似道爲  
山陵使馬廷鸞留夢炎兼侍讀李伯玉陳宗禮范東叟兼侍講

何基徐幾兼崇政殿說書丁亥詔求直言命先朝舊臣趙葵謝  
方叔程元鳳馬光祖李曾伯各上章以匡不逮召江萬里王燾  
洪天錫湯漢等赴闕詔躬行三年喪復濟王元贈官爵追封賜  
諡有司討論墳制增修之加封本生父與芮武康寧江兩軍節  
度使餘並如前從臺諫言竄內侍李忠輔何舜卿遠方戍戍詔  
儒臣日侍經筵十二月辛丑改明年元行銅錢關子率以七百  
七十文爲貫壬寅戒賊吏絕羨餘貢甲辰立生日爲乾會節免  
徵臨安商稅并官私房徼地錢壽崇節亦如之自是祥慶災異  
寒暑皆免名經筵講殿曰熙明命廷鸞進讀大學衍義序陳心  
法之要戶部進兩浙江東西湖南北廣東西福建成都京西潼  
川夔利路戶五百六十九萬六千九百八十七口一千三百二  
萬六千五百三十二大理寺奏大辟三十三人

咸淳元年春正月辛未朔日食帝尊似道有定策功每朝必答拜稱曰師臣而不名二月庚申置籍中書記諫官御史言事歲終以考成績三月甲申擢永穆陵夏四月壬寅賞四川都統符萬壽及將士雲頂山金堂峽之功戊午特加似道太師封魏國公己未幸景靈宮發米贍京城民夔路都統王勝以李市沙平戰功轉官兩資閏五月乙巳久雨京城減直糴米發錢贍小民并賜殿步馬司及宿衛軍士詔以爲常丁卯詔故成都馬步軍總管張順沒於王事特贈五官與子入官恩澤六月乙酉名理宗原廟殿曰章熙御製閣曰顯文並學士待制直閣等官秋七月丁酉初命迪功郎鄧道爲韶州湘江書院山長主祀先儒周敦頤壬戌督州縣嚴錢法禁民閒用牌帖癸亥諒陰命宰執類試阮登炳以下依例賜以出身八月庚辰命陳奕浴江按閱軍

防賜錢給用甲午北兵至廬州安慶諸路統制范勝統領張林  
正將高與副將孟興等戰沒詔各贈官錄子進勇副尉九月壬  
子訪司馬光蘇軾朱熹後人錄用庚申吏部侍郎李常上七事  
崇廉耻嚴鄉舉擇守令黜貪污獻疑獄任儒師修役法冬十月  
壬申減蜀州縣鹽酒課乙亥減田契稅錢庚辰江安州潼川安  
撫司以攻懷簡小宮砦戰圖來上優詔答賞十一月乙未皇兄  
乃裕薨二年春正月癸丑以道專柄二月乙巳侍講范東叟  
奏正心之要一進德二立政三事天上嘉納三月庚子賞夔路  
總管張喜等防護闕達軍功進官有差夏四月甲申侍御史程  
元岳上言帝王致壽之道在清心寡欲崇儉後世林邪說以求  
之往轍可鑒上納之五月以留夢炎同知樞密院事六月丁丑  
給羅鬼國化州印壬午衢州饑命守令勸分諸藩邸發廩助之

秋七月壬辰祈雨八月甲申安南遣使賀登位獻方物冬十二月大理寺奏大辟三十五人三年春正月己丑朔祀南郊大赦癸卯冊妃全氏爲皇后戊申詣太學謁孔子行釋菜禮以顏淵曾參孔伋孟軻配享升顓孫師十哲封邵雍新安伯與司馬光並列從祀禮部尙書陳宗禮國子祭酒陳宜中進讀中牘各進秩賜紫章服及推恩太武宗三學齋長宗正寺等官學生有差二月乙丑淮東總領財賦陳蒙疏論賈似道奸邪誤國安置建昌軍丙子知夔州兼安撫徐宗武築開達石城創立臥龍山堡有功帶行遙郡團練使推恩將士三月癸卯知房州李鑑及將校杜汝隆夏喜戰於龍光皆有功優與旌賞夏五月丁亥朔日食六月留夢炎知樞密院事壬戌加呂文德少傅因任秋七月壬辰右武大夫權鄂州都統汪政戰鄂城并焚光化城外積

聚及攻真陽城皆有功詔轉橫行遙郡甲午符萬壽調統制趙寶楊立等率舟師護糧達渠城有功特升右武大夫帶行左驍衛大將軍賜金帶已酉權黎州張午招諭大青羌主歸義例加優賜從之八月壬戌邊報警急詔諭文德等申嚴防邊遣步帥陳奕率馬軍舟師巡邏江防乙丑進封與芮福王仍主榮王祀稱爲皇叔詔書不名母黃氏隆國夫人皇族與萊檢校少保安德軍節度使加食邑五百戶餘轉官有差壬申久雨命審央滯獄九月癸卯知邕州總統譚淵李旺周勝等由特磨行大理界率兵攻建水州禽其知州阿孛以下并獲人馬焚穀米器甲虜舍師還論功各轉三資軍校補轉有差冬十月庚申復開州賜四川策應司錢百萬勞軍十一月壬寅賞李鑑調遣路將夏喜統領馮興等均州武陽壩戰功十二月丙辰呂文煥知襄陽府



兼京西安撫副使 四年春正月似道專柄罷留夢炎癸未賜

呂師夔紫服金帶己丑北兵於白河口萬山鹿門山興築城堡

檄知鄧州程貴兩淮都統張世傑申嚴備禦己酉改印應雷知

慶元府兼沿海制置使夏四月丙申右正言黃鏞上守邊急務

當合兵農爲一屯田以川蜀爲先民兵次之民兵以淮襄爲先

屯田次之不報丁酉詔賜死節修武郎姚濟廟額曰忠壯五月

辛酉高達乞歸田里命孫虎臣代之壬申賜進士陳文龍以下

及第出身六月罷公田莊官募民自耕減輸租什三毋私相易

違者以盜賣官田論秋八月壬寅奉安寧宗理宗實錄御集日

屏會要玉牒經武要畧咸淳日曆玉牒宰執以下各轉官推恩

有差冬十月戊寅朔日食子憲生十一月癸丑以南平紹慶六

郡鎮撫韓宣城渝嘉開達常武諸州由峽州至江陵水陸措置

盡瘁以死加恩授正任承宣使一子官承節郎丁巳詔知江陵  
府陳奕禪將周全王德等戰西山南谷口田家山有功各以等  
第推戴戊午子鐸生壬申行義役法十二月辛卯賜夏貴金帶  
爲沿江制置副使兼知黃州乙巳賞京湖總管張喜常萬等石  
門坂堰戰功五年春正月似道專柄壬子京湖策應叅謀呼  
延德領諸將張喜等與北兵戰於蠻河二月北人城鹿門知渠  
州張資上蓬州界白土神山蒲渡等處戰功三月丙午北帥阿  
朮師由白河進圍樊城辛酉京湖都統張世傑率馬步舟師應  
援戰於赤灘圍敗之戊辰吳革爲沿江制置使夏四月丙子賞  
世傑功己丑劉雄飛知沅州兼常德澧辰沅靖五郡鎮撫使癸  
巳高郵縣夏世賢七世義居詔旌其門五月壬戌詔信陽諸將  
婁安邦朱興戰千石販呂文煥呼延德戰福山楊青李忠戰石

湫俱有勞效推賞有差壬申優贈徐宗武沒於王事特官一子承節郎六月庚辰呂文福領復州團練使知濠州兼淮西安撫副使甲申皇子昰生秋七月庚申祈雨八月戊寅徭獎將士錢二百萬趣上立功姓名補轉官資九月丙午祈晴辛酉祀明堂大赦丙寅尊上冊寶加壽和皇太后尊號曰聖福皇叔福王食邑一千戶冬十月甲申授子憲檢校太尉武康軍節度使封益國公己丑加呂文德少傅封崇國公食邑七百戶十一月戊辰文德致仕特授少師衛國公十二月癸丑卒贈太傅諡武忠擢堦范文虎爲殿前副都指揮使北兵築南新城夏貴與戰敗績文虎援貴又敗阿朮大治戰艦教水軍進逼襄陽 六年春正月似道專柄壬寅以印應雷爲兩淮安撫制置使高達爲湖北安撫使知鄂州孫虎臣起復淮東安撫副使知淮安州呂文

補准西安撫副使兼知廬州辛酉行成天曆丁卯御製字民攷  
民二訓以戒百官戊辰以趙順孫同簽書樞密院事二月丁亥  
陳宜中經筵進講春秋終篇賜象簡金御仙花帶鞍馬己亥朱  
禕孫權兵部尚書總領夔路轉運知重慶府三月庚子朔日食  
癸丑詔舉廉吏癸亥立賴吉南安要衝四砦聯絡禦寇夏四月  
戊寅文天祥兼崇政殿說書五月辛丑吳革兼宣撫使六月庚  
午詔士子肄業太極圖說西銘易傳春秋傳庚辰子憲歿秋七  
月復開州八月甲申瑞安府樂清縣嘉禾生壬辰詔以推排法  
虛加寡弱戶田租害民爲甚其令各路詢訪亟除其弊九月庚  
戌黃萬石爲沿海制置使壬子救台州被水民冬十月丁丑遣  
范文虎總統殿司兩淮諸軍往襄樊會合備禦賜錢餉師甲申  
趙順孫叅知政事提舉編修勅令經武要畧閏月己酉安吉嘉

興華亭縣水免公田及民租戊午振殿步馬諸軍貧乏及陣沒  
孤遺十二月己亥唐全張興祖等齎蠟書往來入襄陽各轉三  
官賜錢自是北兵築萬山城襄樊路絕 七年春正月似道專  
柄乙丑皇子昀授左衛上將軍封建國公二月淮浙江西大饑  
命振之賊內外百司吏額三月戊子詔宜聖孫延之子與放國  
子監試夏五月乙酉賜進士張鎮孫以下及第出身是日大雨  
如注四川嘉渝江水大溢漂蕩城壁樓櫓圯壞嘉定地震者再  
制使朱禕孫乞罷不許六月范文虎帥師救襄陽不至而逃張  
弘範遂入樊城墮其外廓癸巳知嘉定府省萬壽修城浚壕繕  
甲兵以備禦遇甲午以韓震帶行御器械知江安州兼潼川東  
路安撫副使朱善孫督運受賊被劾貸死配流丙申紹興府諸  
暨縣大風雨雹建德衢州饑發米振糶癸丑以隆暑給襄郢屯

戍將士錢丙辰撫州黃震奏前穀城尉饒立賑荒靳不發米宜  
正其罪詔削兩秩武岡居住己未五河新城完賜名安淮軍令  
鎮江輸米積貯宣分官印應雷以下皆推恩秋七月辛未吳信  
周旺齋蠟書入襄陽城各補三官八月壬辰朔日食甲午遣李  
庭芝詣鄂州調遣犒師夏貴會合策應冬十月癸丑從政郎朱  
鑒係進羣經要畧十一月癸亥詔舉孝弟及廉能材堪縣令者  
蒙古始建國取乾元之義號曰大元十二月甲午詔諸路監司  
巡按刑獄御史臺嚴察儻從擾民丙午命四川制司下渠洋開  
州寧西鎮撫使張朝寶制司犒師時方危急束手無策似道欲  
制東南士心創置士籍令御史陳伯大建議開其鄉里姓名年  
甲三代令鄉鄰結勘方許應試自是人反以科舉爲累 八年

春正月似道專柄辛未子昺生二月旌廉吏趙子寅前知台州

致無所歸特贈直秘閣給沒官田宅養其孤遺三月丙子趙順孫罷授中大夫時襄樊久困鄧鄂路絕夏五月己巳命京湖糶米轉輸襄陽秋八月丙戌朔日食紹興府六邑大水詔減田租發米以賑冬十月庚戌除免仁和錢塘會稽諸縣田租有差十一月丙辰以殿前都指揮陳奕攝侍衛馬步軍司九年春正月似道專柄乙丑樊城破癸未詔定安豐統制金文彪朱文廣王文顯盛全波河古河泉河玳河等處戰功行賞二月丁未加夏貴檢校少保侍衛馬軍都指揮使庚戌李庭芝奏呂文煥叛先納襄陽管鑰次獻城池且陳攻郢州策自爲先鋒上痛切於心罷乾會節宴從弟文福姪師夔席藻上章待命答以勉力捍禦無墮家聲癸丑論朱澗寺戰功推賞來歸人馬宜沿江都統王喜等赴御前三月庚申四川制司送劉整故吏羅鑑自北還

言元取江南二策先收全蜀次城清口桃源河淮要衝屯山東  
軍帝覽之亟詔淮東制司往清口擇利築城以備及遣金吾衛  
上將軍阮思聰山平江鎮江黃州行視城池凡應繕修增易者  
亟條奏來上壬午以密院泄漏兵事稽遲邊報建機速房復置  
樞密院都統制副都統制各一員夏四月辛卯以淮東統領知  
鎮江趙潛兼沿江制置建康留守給錢防捍癸巳知招信軍陳  
巖乞祠下詔卿宜身率諸將宣揚國威以賞戮用命中敵中外  
大小臣僚有材識超卓明控御之宜懷攻守之畧者密具以聞  
朕當虛心以聽丁未遷高達寧江軍節度湖北安撫使知峽州  
詔升忠州潛藩爲咸淳府刺史王遠改刺高州五月乙卯黃萬  
石權戶部尚書兼知臨安府從浙西安撫使朱禕孫奏所部諸  
縣除正辟文臣外諸郡屬邑許令本司一體選辟辛未劉雄飛



致仕尋卒特贈一官戊寅孝成縣丞關應庚上邊防二十事詔授武當軍節度推官京湖任使布衣林椿年亦言十數事詔凡請丞相督師者不允餘付機速房庚辰馬軍司統制王仙昔陷於陣今復來歸特轉五官克殿前司仍賜以錢六月前四川撫司參議官張夢發陳危急三策似道不以聞皆為壽姿自去冬調將士攻成都毀其城今春戰礮門夏又遣統制楊國寶至雅州統領趙忠至倉州詔獎兩路捍禦有勞擢為寧遠軍承宣使將士加賞有差京湖奏去冬開探司總管劉儀盛聰總制趙鐸領精銳至均州文龍崖立砦有功各轉三官添差荆湖北鄂州兵馬鈐轄鐸轉兩官適文煥降均乃受敵知郡劉懋得借捍禦升為右武大夫帶行左衛大將軍因任己丑安南國進方物特賜金帛癸卯陳宜中汪立信各奏言襄樊之禍皆由范文虎聞

難怯戰及俞興父子務復私讐激成整禍其子大忠復挾多資  
爲父行賄且自希榮進今雖寸斬未足以快天下之忿詔追復  
大忠出身文字除名拘管循州文虎降一官因任又言守關進  
義副尉董明故身來歸且嘗立功開州詔特與兩官閏月辛亥  
陳奕總統舟師備鄂與黃州江防丙辰命大理寺丞鍾蜚英點  
視沿江堡隘兵船戊辰知叙州郭漢傑奏馬湖蠻王汝作鹿巫  
蠻王沐丘各助官軍捍禦有功詔賞金帛叙州總管曹順一在  
陣立功趣具等第來上秋七月丁亥詔成都之役權紹慶府節  
制紫城軍義文榮鼎及將校趙居敬丁福孟青蒲祥白貴史用  
羅宜王繁等皆沒於兵各贈官錄子癸巳四川制置言知建州  
趙章知開州鮮汝忠知渠州張資等復洋州又復吳勝堡權檄  
統轄謝益知洋州總制趙桂楫知巴州俾任責吳勝堡戰守之

事安撫張珏請命於朝咸與正授八月癸丑權知均州徐鼎總  
管盛聰戰房州胡師峪板倉知房州李鑑調權竹山縣王國材  
統制熊權總轄馬宗明戰落馬坪白山省萬壽城嘉定烏尤  
山各以勞效論賞九月乙未洪濤爲浙東安撫使黃萬石改湖  
南安撫使冬十月癸丑鎮巢和州太平諸將查文李文用孟浩  
等以射湖岡萬歲嶺後港及焦湖北岸戰功咸賜爵賞丁丑印  
應雷致仕十一月戊子知泰州龔準遣將王大顯等捍禦水砦  
有功獲俘民還詔論賞有差甲午李廷芝請仍分淮東西爲二  
司已惟專力淮東轉夏貴淮西安撫制置兼知廬州陳奕沿江  
制置兼知黃州各賜錢百萬激厲備禦知安豐軍陳萬以舟師  
自城西大澗口抵正陽城遇北兵力戰詔旌其勞 十年春正  
月似道母喪去詔起復之己卯朔永新縣有氣如虹霓自東門

江口起橫貫一邑須臾變作錦文遮蓋四門壬午城鄂州漢口  
癸未權總制施忠節將熊伯明知秦州龔學戰天長縣東橫山  
秦潼湖青蒲口等處有功推賞乙丑留夢炎知潭州兼湖南安  
撫使庚寅城鄂州沌口西岸堡京湖奏襄陽男信中軍鈐轄吳  
信隨文煥往北今并妻子月險來歸詔赴闕存恤丙申詔減江  
東水沙圩租米什四二月己酉趙順孫轉福建安撫使辛酉詔  
革諸制闕使人要求厚賂之弊自今就任升除其誥命衣帶鞍  
馬勿差人給賜違者罪之夏四月乙卯授子爵左衛上將軍封  
永國公詔賞沿江都統王達黃俟黃進寺戰功戊午進呂文福  
知閣門事爲常德辰沅澧靖五州鎮撫使知沅州辛酉詔賞光  
州守陳巖路分李介許彥德總管何成路鈐仰子虎等牛市販  
丁家莊戰功五月丁亥高世傑爲湖北撫置副使兼知岳州總

統出戍軍馬秋七月癸未帝崩於福寧殿壽三十五遺詔太子  
焘卽皇帝位諡曰端文明武景孝皇帝廟號度宗臺臣劾內醫  
蔡幼習詔奪五秩安置五百里外二子並罷閣職帝自壯以好  
內聞理宗議立時夢人語曰此十年天子及是耽於酒色言皆  
有驗

冊曰襄樊已喪亡不容息主淫禍身臣奸賣國憐此繁華  
淪爲異域

孝恭皇帝名焘度宗次子母全皇后以咸淳六年九月己丑生  
於大內九年十一月壬午授左衛上將軍封嘉國公卽位年方  
五歲謝太后臨朝七月甲申賈似道依彥博故事獨班起居帝  
答拜丙戌尊太后曰太皇太后全后曰皇太后立生日爲天瑞  
節辛卯加朱禩孫京湖四川宣撫使兼知江陵八月甲辰詔乞

言於老臣江萬里葉夢鼎馬廷鸞留夢災趙順孫王煇以築清  
河城進李庭芝一秩推賞將士知鄂州李雷應守軍器監知太  
平孟之緝兵部員外郎知江州錢真孫直寶章閣知鎮江洪起  
畏直敷文閣已酉上大行諡癸丑大霖雨天目山崩安吉臨安  
餘杭民溺死亡算發米以賑免今年田租辛未作度宗廟詔趣  
廷鸞與煇之任乞致仕不許九月己卯從似道請帝免答拜癸  
未元兵大會於襄陽分三道伯顏趣鄂州唆都入淮翟招討狗  
荆南丁亥薄郢州都統制張世傑力戰禦之遂去由藤湖入漢  
甲午初開經筵丁酉給夏貴金符十三銀符百激賞奇功己亥  
覆試文武舉人正奏名王龍澤以下賜進士出身壬寅有星見  
西方委曲如蚓復州副將翟國榮遇元兵戰死爛泥湖贈本州  
團練使官其二子仍爲立廟冬十月丙午加知建州趙章右驍

騎中郎將元兵破渠州禮義城知州張資自殺贈着州防禦使  
丁未饒州布衣董聲應進諸史纂約兵鑑刑鑑詔充史館編校  
癸丑廣西經畧邢友龍破湖漳二州寇轉官有差戊午郢州副  
統趙文義兄弟追戰全子湖皆死贈文義清遠軍文亮威武軍  
俱節度使立廟揚州賜名傳忠壬戌發緡錢百萬給郢城屯戍  
將士甲子改明年元乙丑元兵徇沙洋城京湖遣總管王虎臣  
來援丙寅城破虎臣與守隘官王大用皆被執各贈官錄子戊  
辰兵至新城總制黃頤副總仁寧知復州翟貴各以城降十一  
月丁丑命趙潛巡江策應賜錢百萬激賞戰功庚辰命陸秀夫  
淮東張晏然京湖四川並撫司叅議官壬午削諸溢額班直甲  
午詔以邊費浩繁令有司覈實貴戚邸第并寺觀及御前田並  
令輸租丁酉加安南國王陳日熙寧遠功臣子威冕奉正功臣

十二月癸卯朔以隆寒勞賜京湖及沿江戍守將士丁未呂師夔請於江州募兵詔知州錢真孫同預給以尙書省錢米癸丑元兵攻陽邏堡都統制王達戰死乙卯乘雪渡青山磯都統程鵬飛鏖戰被重創歸鄂州屯馬家渡高邦憲棄舟走被執丙辰復攻陽邏堡都統劉成領定海水軍戰死與王達皆贈清遠軍承宣使夏貴沿江縱兵大掠而遁宋禕孫將兵至鄂州聞敗夜奔江陵已未權漢陽軍王儀以城降呂文煥助攻鄂州庚申程鵬飛及權守張晏然以城降幕僚張山翁不屈伯顏命釋之癸亥詔天下勤王李庭芝以兵來赴朝命似道都督諸路軍馬呂師夔黃萬石李珣叅贊軍務孫虎臣總統諸軍乙丑加高達檢校少保湖北制置使兼安撫知江陵府庚午梓宮發引至江上湖失期日晡不至鵬飛以北兵徇黃州知州陳浚降是歲熒惑



犯鎮星闕中地震而旱命臨安府賑贖細民賜七十以上帛及酒米詔三邊撫將士州郡舉遺逸除見追贓賞錢行義田義役及賑避兵淮民蠲淮西四郡未輸屯租

德祐元年春正月癸酉朔元兵入黃州知蘄州管景模降陳奕入之并招其子巖於安東州戊寅詔浙東邸第出米賑糶壬午撥永紹陵乙酉呂師夔錢其孫遣人於蘄州請降丙戌元兵徇江州知壽昌軍胡夢麟寓治自殺知南康軍葉問池州都統張林遣人請降戊子似道出師以孫虎臣爲寧武軍節度使張世傑保康軍承宣使總督府諸軍知德安府來興國知達州鮮汝忠相繼皆降惟夔路安撫張起巖起兵與將弋德復取開州加起巖福州觀察使弋德以下各轉五官乙未祔神主於新宮赦京畿囚戊戌元兵入安慶知府范文虎降通判夏椅仰藥死贈

直秘閣二月癸卯轉黃萬石江南西路制置兼湖北副使乙卯  
詔獎五郡鎮撫呂文福遣兵入衛勞賈似道歲舉改官如史嵩  
之故事庚申王師敗績賈不戰而遁諸軍盡潰似道以單舸奔  
揚州壬戌元兵徇饒州通判萬道同以城降沿江制置趙潛知  
鎮江洪起畏知寧國趙與可知隆興吳益知江陰鄭孺皆棄城  
遁知和州王喜知無爲劉權知太平孟之縉皆降甲子至臨江  
知軍鮑廉死之乙丑詔張世傑將兵入衛便道復取饒州其將  
謝元王海李旺袁恩呂再興戰死各贈十官丙寅文天祥李芾  
起兵勤王丁卯元兵復攻嘉定九頂山都統侯興戰死贈復州  
團練使戊辰徵兩浙福建諸郡廂禁兵以其半入衛己巳以會  
淵子同知樞密院兩浙安撫制置大使兼知臨安文及翁倪普  
同簽書樞密院事庚午加夏貴開府儀同三司樞密副使徵所

部兵入衛下令長吏給經過兵民錢米一切勿征應編配拘鎖人除偽造關會劫盜放火餘悉縱之放免浙西公田逋米及諸處見監賊犯被謫諸文武並令自便仍與叙復辛未加卮萬壽保康軍節度使三月壬申朔詔復茶鹽市舶法遣郝經還諸不恤民政次第除之以公田給佃主令率租戶爲兵癸酉都統翁福徐旺榮迎元兵入建康鎮江統制石祖忠降臨安倣急命浙西刑司準備差遣劉經成吳江兩浙運司準備差遣羅林成銅嶺浙西撫司參議官張濡成獨松關山陰縣丞徐垓正將郁天興成四安鎮趙淮成銀樹栗壩甲戌湖北撫司計議官吳繼明攻通城縣復取之執縣令以歸乙亥元兵至無錫知縣阮應得出城戰一軍皆沒應得赴水死贈十官閩中地復大震丙子下詔罪已侍御史陳過請竄似道併治其黨翁應龍捕下獄刺配

吉陽軍罷廖瑩中王庭劉良貴游汝朱浚陳伯大董樸黃洪起  
畏鎮江自效趙興可除名按捕削陳堅徐卿孫三官丁丑知滁  
州王應龍以城降滁人執歸揚州殺之甲申元兵至西海州安  
撫丁順知東海州施居文知安東州孫嗣武知平江府潛說友  
通判胡玉林鏗知廣德軍令孤繫皆以城降徙浙西提點刑獄  
司於平江府張世傑遣其將閻順李存進軍廣德謝洪永進軍  
平江李山進軍常州轉張德以下各官有差是夜有二星闕於  
中天頃之一星隕已丑趣呂文福入衛加福州觀察保康軍承  
宣使行至饒州殺使者入江州降庚寅兩上左司諫潘文卿右  
正言季可制使會淵子兩浙運副許自浙東安撫王霖龍相繼  
皆遁文及翁侃普諷臺臣劾已章未上亟出關並削官停勒追  
奪應得恩數幽趙興鑿永不收叙自與霖龍淮東制司詰問辛

卯以陳合同簽書樞密院事並轉在京文武兩官令御史臺覺  
察聞兵逃遁者罷右正言徐直方婺州通判張鎮孫闕順戰安  
吉縣復取鳳平顧順復廣德詔褒諭轉官各免田租戰沒者恤  
之壬辰元遣禮部尚書廉希賢工部侍郎嚴忠範來至獨松關  
爲張濡部將所殺又戰洞庭高世傑降癸巳攻岳州總制孟之  
紹亦以城降鼎澧常德聞之皆納款戊戌赦邊城降將罪能自  
拔歸者錄之復州者予知州復縣者予知縣所部僚吏將卒及  
土豪立功同賞雉江軍統制洪福率衆復鎮巢軍卽以知軍事  
庚子徙淮東總領所於江陰軍加吳其明閤門宣贊舍人夏四  
月乙巳元兵入廣德知縣王汝翼與寓官趙時晦率義兵戰於  
斗山路分孟唐老及其二子皆死贈三官汝翼被執至建康亦  
死贈朝奉郎錄子丙午元兵破沙市城都統孟紀死之監鎮司

馬夢求自經戊申朱祺孫高達以江陵降京湖北路相繼亦下

張起巖提兵保飛山癸丑總統張敏戰死豐城贈五官錄其一

子乙卯加福王與芮武康寧江兩軍判紹興府丁巳總制霍祖

勝攻溧陽復取之戊午知金壇李成大率義局官舍山縣尉胡

傳心陽春主簿潘大同濠梁主簿潘大喬進士潘文孫潘應奎

復取金壇鎮江統制侯巖縣尉趙嗣濱反助元兵來戰成大二

子及大同等皆死之成大被執不屈亦死詔並贈官推賞癸亥

加知思州田謹賢知播州楊邦憲並復州團練使趣兵入衛有

大星自心東北流入濁没乙丑癸惑犯天江戊辰詔宜興溧陽

民兵助戰及旌德城守有功特免見租江陰民被兵亦如之庚

午元兵至楊子橋都撥發官雷大震戰死贈保康軍節度使五

月癸酉至寧國知縣趙與璿吏楊義忠率義兵出戰死甲戌淮

安總制李宗榮淮東鈐轄阮克已知慶遠府仇子真將兵勤王  
加克已左驍騎中郎將丁丑詔趙潛統軍民船屯江陰司戶趙  
必佶總管陸春戰死辛卯貶潛說友南安軍令狐慤鬱林州吳  
益汀州與呂文煥孟之縉陳奕范文虎並籍其家削李珣職貶  
婺湖梧三州甲午饒信州饑令民入粟補官罷市舶分司令通  
判任舶事丙申詔世傑張彥阮克已仇子真四道出兵遣使告  
天地宗廟社稷諸陵宮觀己亥勞軍吳繼明復蒲圻通城崇陽  
三縣加帶御器械權知鄂州將士各轉官令擇險爲寓治贈鮑  
廉趙與璿並直華文閣官其一子楊義忠武功大夫六月庚子  
朔日食旣實晦如夜皆萬壽以嘉定及三龜九頂紫雲城降知  
叙州李演將兵來援遂解歸戰羊雅江兵復敗被執辛丑復魏  
克愚官補太學生蕭規唐棣並承信郎壬寅知嘉興余安裕求

去始書朝中語涉不道削官送徽州丙午貶陳過平江府徐卿  
孫吉州戊申命舉將帥才堪文武毋拘謫籍惟丁大全黨與不  
預辛亥銓試甲寅留夢炎入朝拜右丞相兼樞密使與陳宜中  
都督諸路兵乙卯詔求言戊午知叙州郭漢傑知瀘州梅應春  
知富順監王宗義各以城降秋七月庚午朔江西制置黃萬石  
移治撫州詔還隆興府辛未世傑并諸軍戰於焦山敗績甲戌  
連徙似道除瑩中王庭良貴名貶昭梅信三州庚辰賞定邊功  
加知泗州譚興閣門宣贊舍人知懷遠軍金之才帶御器械知  
安淮軍高福閣門祇候知濠州孫立右衛大將軍壬午路幹劉  
用調兵入靖州通判張起巖復之就加太府寺丞知州事轉用  
官免徵州租丙戌糴公田租佃主種戶各得價半但被兵處勿  
糴浙西邸第寺觀糴十之二庚寅籍沒似道家財編管衢州詔



監司郡守有避事不卽到官者覺察以聞貶胡玉連州林鏗韶  
州並除名癸巳轉夏貴知揚州不納擢朱煥知廬州八月己亥  
朔總制毛獻忠將衢州兵入衛辛丑疏決臨安罪人壬寅夏貴  
爲兩淮宣撫大使總制戴虎破大南砦轉三官元兵駐巴陵縣  
黃沙乙巳吳繼明復平江縣以爲湖北招討使諸將各轉三官  
戊申試太學上舍生己酉拘閩貴妃集慶寺買貴妃演福寺田  
還安邊所癸丑復嘉定七司法戊午熒惑犯南斗庚申趙淇前  
以獻寶玉諂媚似道除大理少卿王應麟封還錄黃罷之九月  
辛未加田謹賢福州楊邦憲利州並觀察使趣入衛辛巳祀明  
堂赦丙戌元兵至泰州知和州孫虎臣自殺贈太尉乙未張彥  
與元兵戰被執以城降冬十月癸卯玉牒殿災戊午徵紹興處  
士陸應月史館編校文字壬戌元兵發建康叅政阿剌罕總管

吳魯赤將右軍自四安鎮趨獨松關叅政董文炳范文虎將左軍山江路入江陰李世修以城降丞相伯顏將中軍入常州癸亥麻士龍援常州戰死贈高州刺史張全朱華臨陣退師免官不問十一月丁卯朔銅關將貝寶胡巖起攻深水死贈寶武翼郎巖起朝奉郎庚午黃鏞簽書樞密院事命舉將才不佞偏裨士卒許投匭自薦戊寅元復破廣德軍己卯破四安正將胡明等死之召文天祥亟入衛辛巳起居舍人會唯禮部侍郎陳景行辭官不允竟去削官免之壬午元兵至隆興府黃萬石奔撫州運判劉槃通判施至道以城降癸未破興化知縣胡拱辰自殺乙酉改宜興縣爲南興軍丁亥獨松關告急調民兵出守己丑關破馮驥死之贈集英院修撰張濡遁平江通判鄭時望風亦遁降官罷之庚寅通判王矩之都統制王邦傑遣人於常

州迎降甲午萬石提兵走建昌軍丙申賜餘杭武康長興縣民  
錢并免田租十二月戊戌復趙與可都督府叅議官放李珣自  
便庚子以吳堅簽書樞密院事賜謝堂同進士出身同知院事  
黃鏞遣柳岳奉書詣元軍稱盜殺廉尚書乞班師修好不聽嘉  
興府又告急令與封樁庫錢備兵復季可官令如龍泉縣募兵  
乙巳復以陳景行爲浙東安撫副使戊戌州命趙與偃戍縉雲  
縣起方逢辰戍淳安縣丙午追封呂文德和義郡王丁未元兵  
入平江起吳君擢爲太府少卿提點臨平民兵乙酉括臨安并  
諸縣馬癸亥遣宗正少卿陸秀夫刑部尚書夏士林兵部侍郎  
呂師孟使軍前詔呂文煥趙孟桂務令通好己未方輿丁廣趙  
文禮兵皆敗權吏部尚書丁應奎左侍郎徐宗仁遁庚申加柳  
岳工部侍郎與右正言洪儒震使燕所請元兵攻大洪山知隨

州朱端履降 二年春正月陸秀夫等至元軍求稱姪納幣不許稱姪孫亦不從戊辰還太皇太后命用臣禮已嘉興劉漢傑以城降庚午黃鏞陳文龍遁以謝堂爲兩浙鎮撫大使文天祥知臨安府加全永堅太尉浙東招諭使辛未命吳堅爲左丞相兼樞密使未幾亦遁日午宣麻慈元殿文班止六人諸關兵盡潰遣監察御史劉昂率表稱臣上大元皇帝尊號曰仁明神武皇帝歲奉銀絹二十五萬乞存境土以奉蒸嘗癸酉右司諫陳孟虎監察御史孔應得遁甲戌元兵至瑞州知州姚巖棄城去乙亥以賈餘慶知臨安府丁丑夏士林簽書樞密院事數日亦遁惟三學生誓死不去特放出身己卯入安吉州知州趙良淳自經死辛巳祀太乙宮授留夢炎江湖兩地宣撫大使甲申元兵至阜亭山遣御史楊應奎上傳國璽奉表稱臣削去帝號

悉獻兩浙福建江東西湖南二廣兩淮四川見存州郡仍爲宗社生靈祈哀請命曲賜存全丙戌命天祥同吳堅使大元軍戊子知建康軍方回知婺州劉怡知處州梁椅知台州楊必大皆降知臨江軍滕巖瞻遁元兵入信州二月丁酉朔日中有黑子相盪如鵝卵辛丑詔諭郡縣皆降元使人入臨安封府庫收史館禮寺圖書及百司符印告赦罷官府及侍衛軍壬寅元軍駐錢塘江沙上三日潮及期不至三月丁丑帝及全太后福王并宗室駙馬大臣庶僚諸生咸赴燕京五月丙申朝於上都降帝爲開府儀同三司封瀛國公尋爲僧號合尊太師

二王者度宗庶子長建國公昞母淑妃楊氏季永國公昺母修容俞氏度宗崩日謝太后召似道等入宮議所立衆以爲昞長當立似道主立嫡乃立焜而封焜爲吉王領保康軍昺信王領

保寧軍皆節度使開府儀同三司各食邑一千戶文天祥以兵

危急請鎮閩廣不從始俱命出關逃迫臨安宗濬同謀徒封是

為益王判福州福建安撫大使曷為廣王判泉州兼判南外宗

正命駙馬都尉楊鎮輔之拜楊亮節福州觀察使提舉益王府

行事俞如珪為環衛官提舉廣王府行事元兵至阜亭山鎮等

奉之走婺州伯顏入臨安遣范文虎將兵趣婺召鎮以王還鎮

得報即還曰待我就死於彼以緩追兵亮節等遂負王徒步匿

山中七日其將張全引兵數十始追及之遂同走温州陸秀夫

蘇劉義繼追及於道遣人召陳宜中於清澳來謁復召張世傑

於定海亦以所部兵至江心寺故有高宗御座眾相率哭座下

奉王為天下兵馬大元帥曷副之撥兵除吏以秀王與翠為福

建察訪兼安撫使知西外宗正趙吉甫知南外宗正兼福建同

提刑命先入閩撫諭吏民百姓太皇太后遣二宦者與兵八人來召王宜中等沉之江中夏四月入閩時汀建諸州方欲從黃萬石降聞昞至仰閉城却使者萬石將劉俊宋彰周文英輩亦多來歸五月乙未朔宜中等立昞於福州以爲宋主改是年爲景炎元年遙上帝尊號爲孝恭懿聖皇帝冊楊淑妃爲太后同聽政封昞爲衛王宜中爲左丞相兼都督召李庭芝爲右丞相姜才爲神龍四州都指揮使陳文龍劉黻叅知政事張世傑樞密副使陸秀夫簽書院事命吳浚趙潛傅卓李珣翟國秀等分道出兵升福州爲福安府温州爲瑞安府郊赦之日黎明有大聲出府中衆皆驚什庚辰文天祥自鎮江亡歸以爲右丞相兼知樞密院事同都督諸路軍馬遣其將呂武入江淮招彙傑杜澣如温州募兵適廣東經畧徐直諒遣梁雄飛請降於隆興假

以招討使俾徇廣州既而直諫聞是立命權通判李性道推鋒  
軍將黃俊等拒雄飛於石門俊戰敗性道不戰奔廣州直諫棄  
城遁六月丙子雄飛入廣州諸降將皆授以官俊獨不受遂爲  
衆所殺吳浚聚兵於廣昌取南豐宜黃寧都三縣翟國秀取秀  
山傅卓至衢信諸縣民多應之者七月丁酉天祥開府南劔州  
經畧江西吳浚兵敗於南豐翟國秀聞之引還傅卓兵敗詣江  
西元帥府降平章阿里海牙破嚴關馬暨退保靜江府是月揚  
州守將朱煥以城降李庭芝姜才死之淮東州縣皆降八月漳  
州亂命陳文龍往討甲戌秀王與畢剛婺州聞元兵至解歸丙  
子以王積翁爲福建提刑招捕使知南劔州備禦上三郡黃佺  
同提刑招捕使知漳州備禦下三郡張世傑遣兵助吳浚與元  
帥李恒戰斃零兵敗奔寧都九月興化石手軍亂復以文龍知



軍事東莞人熊飛爲黃世傑守潮惠三州間趙潛至卽以兵應之攻廣州壬寅雄飛遁遂復韶州新會適會逢龍亦帥兵至廣李性道出謁飛與逢龍執而殺之衢州守將魏福興出戰福星橋死壬子趙潛入廣州是月招討也的迷失會東省兵於福州元帥呂師夔張榮實將兵入梅嶺十月壬戌朔文天祥入江州趙潛遣會逢龍就熊飛禦元兵於南雄逢龍戰死熊飛奔韶州元兵圍韶守將劉自立以城降飛率兵巷戰兵敗赴水死十一月叅政阿剌罕董文炳將兵至處州李珣以城降甲辰秀王與畢逆戰於瑞安觀察使李世達死之與畢及其弟與慮子孟備監軍趙由瑄察訪使林溫被執皆死阿剌罕兵至建寧執守臣趙崇鑣知邵武軍趙時賞知南劍州王積翁皆棄城去乙巳是入海癸丑元兵至福安州知州王剛中以城降是舟至泉招撫

蒲壽庚來謁請駐蹕張世傑不可或勸世傑壽庚提舉泉州舶司擅番利者三十年留壽庚則海舶不令自隨世傑不從縱歸繼而舟不足仍命掠舟并沒其貲壽庚怒殺諸宗室及士大夫與淮兵之在泉者乃移潮州是月福與興化皆降英德守凌彌堅徐夢得等亦降十二月辛酉朔趙潛棄廣州遁乙丑制置方興亦遁吳浚走入瑞金戊辰蒲壽庚及知泉州田真子以城降乙酉通判曹澄孫以興化降陳文龍不屈而死是次甲子門景炎二年春正月元兵破汀關癸巳知衢州劉興降壬寅吳浚棄瑞金遁鎮撫孔遵入之天祥走漳州浚尋還汀州降戊申知潮州馬發及通判戚繼祖降癸丑復來歸丁巳權知梅州錢榮之以城降二月元兵至廣州縣人趙若岡以城降廣東諸郡聞風皆下三月天祥取梅州又取興國縣四月廣東制使張鎮孫

襲廣州梁雄飛等棄城走韶州五月世傑取潮州天祥自梅州  
提兵出江西入會昌縣淮民張德興亦起兵殺太湖縣丞王德  
顯據司空山攻下黃州壽昌軍丁巳遇宣慰鄭鼎戰樊口鼎墮  
水死六月辛酉天祥取零都已卯入興國縣秋七月遣兵取吉  
贛諸縣遂圍贛州衡山人趙燔撫州人何時皆起兵來應乙巳  
世傑圍泉州遣將高日新復邵武淮兵在福州者欲殺積翁以  
應世傑皆爲所戮江西宣慰李恒遣兵援贛州而白將兵入興  
國八月天祥與諸將兵皆敗乃引兵卽鄒淵於永豐源兵亦潰  
巳巳熒惑掩月天色赤壬申天祥兵敗於興國巳卯元兵破司  
空山張德興亡走甲申天祥至空坑兵盡潰遂挺身走循州諸  
將皆被執九月元帥唆都援泉州戊申世傑歸淺灣元左丞塔  
出將兵入大庾嶺叅政也的迷失復取邵武入福州十月甲辰

峻都破興化軍進攻潮州馬發拒之乃去攻惠州十月終出  
廣州張鎮孫以城降庚寅元帥劉深以舟師攻淺灣昱走秀山  
陳宜中往占城遂不反十二月丙子是至井澳遇颶風舟壞震  
驚成疾旬餘兵士稍集死者十四五丁丑劉深追昱至七州洋  
執俞如珪以歸

祥興元年春正月元兵平廣州世傑遣王用攻雷州不克己酉  
元兵克涪州執守將王明二月元兵破潮州馬發死之三月天  
祥取惠州廣州都統凌震轉運判官王道夫復取廣州昱欲往  
占城不果遂駐碭洲遣兵取雷州適曾淵子自雷來拜為叅知  
政事廣西宣諭使夏四月戊辰昱烈懇臣權土廟號曰端宗庚  
午復立衛王昺以為主拜陸秀夫左丞相五月癸未朔海中有  
黃龍見敗元祥興升廣州為翔龍府碭洲為翔龍縣遣張應科

王用取雷州三戰皆不利用因降六月丁巳應科再戰死之知高州李象祖降已未曷徙居厓山已巳有大星東南流墮海中小星千餘隨之聲如雷數刻乃已巳卯元將張洪範李恒引兵至秋七月趙與珞與謝明謝富守瓊州阿里海牙遣馬成旺招之與珞率兵拒於白沙口冬十一月癸巳州民執與珞以降閏月庚戌王道夫棄廣州凌震又遁癸亥元兵入廣十二月壬午道夫反攻城兵破被執震繼至亦敗天祥走海豐壬寅洪範執之於五坡嶺震兵又敗於交塘元兵破南安縣守將李桂發死之二年春正月壬戌洪範兵至厓山庚午恒兵亦來會世傑以舟師碇海中結巨艦千餘艘中爐外舳貫以大索四周起樓棚如城堞居曷其中元軍來攻艦堅不動用舟載茅沃以膏脂乘風縱火世傑命艦皆塗泥縛長木遠拒火舟不能近二月戊

寅朔世傑部將陳寶降已卯都統張達夜襲元兵營亡失甚衆  
癸未有黑風出山西恒乘早潮退攻其北世傑引淮兵殊死戰  
至午潮上弘範攻其南南北受敵兵士皆疲遂不能戰俄有一  
檣旗什諸舟見之皆什世傑知事去乃抽兵入中軍諸軍潰翟  
國秀及團練使劉俊等解甲降元兵至中軍會暮且風雨昏霧  
四塞咫尺不相辨世傑與劉義斷維奪港而去秀夫走衛王舟  
大且諸舟環結度不得出秀夫乃負王投海中後宮及諸臣多  
從死者七日尸浮出凡十餘萬楊太后撫膺大慟亦赴海死世  
傑葬之海濱遂自溺死南宋亡凡歷七帝一百五十二年

冊曰兩朝廷祚大畧相同何代不亡尚關遺風生報世恩

死竭愚忠

弘簡錄卷九十八

終

卷九十八

七

天正末十五

弘鏡錄卷九十九

宰輔 朱二之一

范質

子晏從  
子杲

王溥

父祚子  
貽孫

魏仁浦

趙普

弟安易

薛居正

子惟  
吉

呂餘慶

沈倫

子繼

盧多遜

父億

宋琪

附宋雄

李昉

子宗訥宗諤  
述從孫昭選

呂蒙正

子居簡等

范質字文素大名宗城人父守遇鄭州防禦判官母夢神人投以五色筆而生十三治尚書能屬文登後唐長興進士調忠武節度推官遷封丘令入晉爲柔維翰所器奏除監察御史辟從事相州泰寧晉昌遷主客員外郎直史館少帝時轉翰林學士知制誥常夜直召諸學士分草漢祖等十五將出征制質恐漏

泄獨具草進切中機宜漢初歷中書舍人戶部侍郎每朝廷欲  
征討處分軍事皆出其手稱有宰相材周祖自鄴起兵京城擾  
亂質匿民間因物色得之周祖喜甚令草太后誥及議迎湘陰  
公儀注倉卒稱意白爲兵部侍郎兼樞密副使廣順初轉中書  
侍郎平章事集賢殿大學士郊恩進左僕射兼門下侍郎監修  
國史建議律條繁冗輕重無據吏得因緣爲奸世宗特命詳定  
是爲刑統俄知樞密院事世宗不豫入受顧命恭帝嗣位加開  
府儀同三司封蕭國公方值早朝聞陳橋變起下殿執王溥手  
曰倉卒遣將吾輩之罪也爪入溥手幾出血溥禁不能對退就  
食閣中幸溥與魏仁浦就點檢署所謁宋祖惶恐不知所措但  
曰太尉旣以禮受禪則事太后當如母養少主當如子太祖揮  
涕許之乃奉詣崇元殿行禪禮畢加守司徒兼侍中罷知樞密



俄被病宋祖征澤潞幸其第賜黃金器幣時朝儀草創宗親藩  
輔尙未崇建幕府賓佐亦未列階贊皇弟光義光美並行封  
冊皇子女自襁褓以上加以恩制并授呂餘慶樞密副使轉趙  
普以台司帝戚嘉納唐及五代凡與宰相議大政天子必命坐  
而論賜茶日送及是質憚帝英睿每事乞具劄子進呈庶盡稟  
承之方免妄庸之失詔從之坐論之禮始廢乾德初有事鬪丘  
爲大禮使與張昭劉溫叟討論舊典定南郊行禮圖上之自此  
禮文漸備進封魯國公二年罷爲太子太傅薨年五十四帝輟  
朝悲惋贈中書令賜賻加等自戒勿請諡勿刻墓碑爲人性明  
悟幼時有目者言異日當大位不學何以處之自是力學強記  
和凝知貢時爲所浚知曲加愛重列名并拜相封國前後皆同  
世共相傳謂之傳衣鉢位旣通顯猶不釋卷累代常制伏其該

賂勅下未嘗破律尤以戶口版籍爲急每任刺史縣令必使按  
視民田留意獄訟務延見之爲述天子憂勤之意然後遣行世  
宗征淮南駐師濠壽銳心攻取每以師老泣諫隨幸揚州世宗  
因事怒資儀罪在不測質力救得解然居已輒下急好面折人  
過操持清介不受賂遺亦罕營生產所得祿賜給孤繼親自奉  
澹如也既沒家無餘貲太祖稱爲真宰相太宗亦口質能循規  
矩慎名器持廉節無出其右但欠世宗一死爾有集三十卷其  
述宋梁五代至周爲通錄六十五卷 子旻字貴參十歲能文  
蔭補千牛備身宋初累度支員外郎判大理寺知開封太宗領  
京召語器之開寶九年知淮南轉運事稱有心計歲運米百餘  
萬給京師錢似歸爲考功郎中權知兩浙諸州軍事悉除征賦  
煩苛之弊至右諫議大夫三司副使加給事中卒年四十六子

貽孫官至主客員外郎 從子杲字師回父正青州從事早卒  
質視如已子幼刻志問學性虛誕爲文澠僻難曉與姑臧李均  
汾陽郭昱齊名陶毅實儀丞稱之復與柳開善更相引重始終  
無間初蔭補齊郎遷四門博士著作佐郎直史館嘗求懸秩質  
作詩曉之人傳以爲勸戒擢知制誥上以翰林學士畢士安德  
行優於他人飛白大書玉堂之擘四字令扁於廳端杲因獻玉  
堂記請備其職上惡其躁競出知濠州尋改右諫議大夫卒年  
五十六子坦進士

王溥字齊物并州祁人父祚初爲小吏有心計晉祖入洛掌鹽  
鐵案漢祖鎮并州委經度芻粟卽位擢三司副使歷周爲隨商  
州三州刺史鄭州團練使宋初升宿州爲防禦以領使至溥執  
政始諷罷之素殉貨殖所置田宅累萬金溥登漢乾祐進士授

秘書郎周祖真蒲津辟從事轉太常丞卽位由左諫議大夫樞密直學士遷中書舍人翰林學士歷戶部侍郎端明殿學士周祖疾革拜中書侍郎平章事世宗進禮部尙書監修國史顯德四年外艱起復知樞密院事恭帝加右僕射與扈蒙等同修世宗實錄質等同見宋祖初不肯拜溥先拜質不待已從之且稱萬歲禪位進司空兼門下侍郎罷樞密使乾德二年罷爲太子太保舊制班臺省之後祖因寵溥舊相卽令臺省分班東西遂爲定制五年加太子太傅開寶二年轉太子太師上顧左右稱其十年作相三遷一品福履之盛近世無比太平興國初封祁國公薨年六十一輟朝贈侍中謚文康爲人性寬厚美風度好汲引後進所薦至顯位甚衆其學至老不厭嘗補菴見崔鉉所錄闕漏爲唐會要百卷又采宋梁至周爲五代會要三十卷并

文集二十卷世獨言其平居頗吝并不能死國以是少之四子  
貽慶比部郎中貽序司封員外郎貽正國子博士貽孫累遷右  
司郎中尤知名 貽孫字象賢少博學父所分賜吳蜀文史萬  
卷咸遍覽之太祖嘗問趙普拜禮男子跪何婦人獨否貽孫曰  
古詩長跪問故夫是婦人亦跪也唐武后朝婦人始蹲而不跪  
普問所出答云太和中幽州從事張建章著渤海國記備言其  
事普稱賞之端拱中僕射李昉求郡百官集議舊儀貽孫具以  
對事見禮志當時許其諳練云

魏仁浦字道濟汲縣人幼孤貧母爲假黃縑製暑服仁浦年十  
三歎曰爲人子不能養乃使慈母求貸以衣我乎因泣下辭母  
詣洛陽濟河沈衣中流誓曰不貴遂不渡此河晉末爲密院刀  
筆吏端謹善書密切心計不願事降將杜重威遁去會漢祖起

迎謁鞏縣補舊職時周祖掌樞密召問闕下卒乘之數悉能記  
之手疏六萬人祖喜遂從鎮鄴後隱帝密詔李洪義加害周祖  
懼謀於仁浦對曰侍中握強兵臨重鎮有功朝廷君上信讒圖  
害忠良雖欲剖心自明奚可得乎今詔始下外無知者莫若更  
易其語以盡誅將士爲名激其怒心非徒自免且可爲楊史雪  
冤祖澘然之僞爲詔旨以示諸將衆懼且怒遂長驅渡河事成  
趙擢樞密副承旨俄遷右羽林將軍周祖問諸州屯兵之數及  
將校名氏手疏於紙校籍無差尤倚重焉母喪起復值周祖大  
漸詔世宗曰李洪義長與節鎮魏仁浦無遺避禁密及卽位授  
右監門衛大將軍樞密副使進檢校太保加太傅賜爵邑俄遷  
中書侍郎平章事集賢殿大學士兼樞密使恭帝拜刑部尙書  
宋興進右僕射兼中書侍郎以疾在告太祖幸其第賜黃金泉

布等再上表乞骸不許乾德初罷守本官開寶二年春宴太祖  
密諭朕欲親征太原如何對曰欲速不遑惟陛下慎之宴罷賜  
上尊御膳從征至中途遇疾還至梁侯驛薨年五十九贈待中  
景德中諡宣懿爲人性寬大有度接士大夫有禮務以德報怨  
權鹽使鄭元貽與仁浦婦翁李溫玉有隙誣溫玉以叛周祖知  
而不問後元貽不自安仁浦畧不芥蒂白周祖召元貽至京授  
慶州刺史隱帝寵作坊使賈延徽欲并仁浦居第屢譖之周祖  
入汴延徽被擒仁浦力保全之時稱長者遇世宗卞急近侍忤  
旨輒輕殺戮仁浦常爲仲救全活頗衆征淮南獲賊兵數千無  
濫殺悉隸諸軍子三咸美左司禦率府率咸熙累遷屯田郎中  
至太僕少卿咸信尙主

冊曰三相功名世顯相仍貴以大義難免所憎

趙普字則平幽州人父迥後唐趙德鈞爲帥暴虐舉族徙常山又遷洛陽自幼澆厚寡言鎮陽豪族魏氏妻之以女顯德初辟永興劉詞節度從事表薦於朝范質征淮南奏爲軍事判官宋祖拔滁州待以宗分適宣祖臥病普奉藥餌斯夕不離普與語奇之時獲盜百餘當棄市普疑有寃啓太祖訊鞠獲全者衆淮南平復改潤州判官自此太祖領同州鎮宋州日見親用表爲掌書記陳橋推戴普先預聞與匡義排圍入告衆方擁入及受禪以佐命功授右諫議大夫樞密直學士賜金紫征李筠命與呂餘慶留守事平遷兵部侍郎樞密副使賜第一區拜樞密使檢校太保會賀等同日俱罷卽以爲門下侍郎集賢殿大學士同平章事相視如左右手事無大小悉咨決焉每退朝慮上微行不敢便衣冠一以小雪向衣帝不出久之聞叩門聲普



函出帝立風雪中懼迎拜帝曰已約晉王矣已而太宗至  
設重裯坐堂中熾炭燒肉普妻行酒帝以嫂呼之因與普定下  
太原計普曰太原當西北二面若下我獨當之不如姑俟削平  
諸國川殫光黑子之地將安逃乎帝笑曰吾意正如此特試卿  
爾又嘗以兩燕地圖示普問進攻之策普曰圖必出曹翰上曰  
然因問翰可取否對曰翰可取孰可守上曰以翰守之又曰翰  
死孰可代其沒慮類若此五年加右僕射昭文館大學士十二  
月母憂去位丙子起復勅帝遣使分詣諸道徵丁壯籍名京師  
以備守衛諸州置通判使主錢穀由是兵甲精銳府庫充實至  
開寶中獨任相位及十年爲政頗自專廷臣多忌者嘗因病駕  
卒臨幸適錢俶遣使致書及海物十瓶方置廡下不及屏帝顧  
問之普以實對上曰海物必佳卽命啓之皆瓜子金也普惶恐

謝曰嘗尙未發臣實不知帝笑曰受之無妨彼謂國家事皆由汝輩生爾會有禁販蔡隴大木普遣親吏市屋材因竊貨大木冒稱普市貨鬻都下爲三司趙玘所奏上積前疑怒將逐之玘王洵解免盧多遜屢言普以隙地易尙食疏圃開廣居趾且營邸店規利復以私怨誣樞密直學士馮瓚殺錦副使李美殿中侍御史李穡論死判大理寺雷德驤削籍會德驤子有麟擊登聞鼓訟堂後官胡贊李可度受王洞賊劾法刻帝爲作攝牒得官又庇趙孚授官西川稱疾不赴諸不法事上益怒下臺按問悉抵罪普恩益替先是普常於政事閒中設大盎凡表疏意不愜者投而焚之其得藹多以此普不自安求罷出爲河陽三城節度使檢校太傅同平章事太平興國初入朝改太子少保更太保奉朝請爲多遜所毀謂普初無立上意鬱鬱不得志者數

年值柴禹錫等告秦王驕恣帝名問普因言願備樞軸以察妄  
變退而上書自陳預聞願託之事上名見慰諭拜司徒兼侍中  
封梁國公秦王表以勳得再登元輔班乞居下從之上多普有  
功不欲煩以機務八年復出爲武勝軍節度使檢校太尉作詩  
餞之普捧誦泣下帝爲動容雍熙三年大軍討幽薊普具疏切  
諫願罷伐燕之師帝手詔褒答復上表謝四年移節山南東道  
改封許國公因耕籍表求入覲既至慰撫數四禮畢適太宗欲  
相呂蒙正以其新進欲藉普舊德表率冊拜太保兼侍中中書  
故事日向未始歸詔特許普至午時歸私第俄因建議趙保忠  
領夏臺故地陰圖趙保吉二人合謀同叛時論皆歸咎之尋免  
朝止赴中書視事有大政則召對至冬被疾乞謝進兼中書令  
爲河南尹西京留守淳化三年遣中使及弟安易賫詔存問進

太師魏國公薨年七十一生聞震悼出涕稱其能斷大事傾竭  
自效盡忠國家真社稷臣蓋指光美德昭事也爲出次發哀廢  
朝五日贈尚書令追封真定王諡忠獻御撰神道碑銘親書以  
賜遣攝鴻臚卿范杲護喪賻則特厚葬日有司設鹵簿鼓吹如  
武舊從起側微性澁沈有岸谷頗多陰刻常以睚眦中傷人然  
能自任天下之事帝有天下屢言微時所不足者祖曰若塵埃  
中可識天子宰相則人皆物色之矣自是不復言太宗因弭德  
趙詢疑曹彬不軌普力爲辯雪保證帝悟遇彬如舊有祖吉守  
郡爲姦利事覺值郊祀近特諭勿原普言敗官抵罪誠宜但上  
郊事重未可因小有乖上善其言亦止咸平初追封韓王配享  
太祖廟庭子承宗羽林大將軍知滑郟二州承煦成州團練使  
弟固都官郎中安易字季和初爲府州錄事參軍遷河南

官以寄理十年不赴調太平興國中拜監察御史知興元府轉  
殿中侍御史賜緋魚袋歷知襄盧二州就遷宗正少卿咸平初  
升卿時屬籍未備奏請纂錄命與梁周翰同修爲人畧涉書傳  
性強狠好談世務欲復井田之制然踈濶不可用又詳定明德  
皇太后立主升祔與判禮院孫何議論往覆卒從元議晚歲進  
趨不已時論嗤之卒年七十六贈工部尙書子承度國子博士  
孫從政奉禮郎

冊曰猗嗟元臣乘時奮起佐致太平兩朝毗倚魯論牛部  
莫知義比。遜出信成。用違其旨。未離忠失。君子所恥。

薛居正字子平開封浚儀人周太子賓客仁謙之子少好學個  
儻有大志氣貌瓌偉爲文落筆不休識者預知公輔之器登後  
唐清泰進士晉天福中辟華帥劉遂凝從事兄遂濟領州討復

奏署鹽鐵判官改度支宰相李崧奏授大理寺直學右拾遺桑維翰尹開封復署判官漢乾祐初史弘肇部下吏以私憾誣告民犯鹽禁當死居正疑其不實召詰之果然反坐抵罪卒無以屈周廣順初遷比部員外郎領三司旋知制誥加都官郎中顯德二年遷左諫議大夫弘文館學士判館事擢刑部侍郎判吏部銓宋初遷戶部侍郎太祖征潞及楊並留三司俄出知許州建隆三年入爲樞密直學士權知貢舉初平湖湘遷知朗州會亡卒聚山澤爲盜監軍疑寺僧千餘人爲黨欲捕誅之若正以計緩其事及羣寇蕩滅擒帥汪端詰之僧果不預賴以全活乾德初加兵部侍郎車駕將親征太原發民餽運時河南餓上憂逃亡者多命馳傳招集決旬民盡復業還改吏部侍郎上疑趙普獨任始置叅知政事以分其權命與呂餘慶爲之不押班宣

制知印不預奏事不升政事堂止令就宣徽廳事上視事殿廷  
別設碑位救尾署銜降宰相月俸雜給半之米欲與普齊也開  
寶五年遷淮湖嶺南等道都提舉三司水陸發運使兼門下侍  
郎兼修國史及五代史次年秋成上之賜器幣有差六年拜門  
下侍郎平章事上以年穀方登庶物豐盛所宜共思濟物或有  
闕政急宜攻舉以成朕志始與趙普等更迭知印奏事益修政  
務以副上意太宗卽位加左僕射昭文館大學士從平晉陽論  
功進位司空因進丹砂遇毒壽年七十贈太尉中書令諡文惠  
爲人性行純孝居家儉約歷任寬簡不好苛察自參政至輔相  
凡十八年太祖嘗諭以自古爲君者鮮克正已爲臣者多無違  
畧雖若顯位不能垂名後代且身陷不義子孫罹殃均爲道有  
未盡其有能始終保全享祿位者皆由忠正無虧自是益思勤

勉思遇不替果符太祖之言有集三十卷咸平二年配饗太祖廟庭無子 假嗣惟吉字世康少嗜酒蹴踘不得與清顯補千牛備身歷西頭供奉官後改行多交賢士大夫時復翕然稱之歷知澶揚二州有能聲終左衛大將軍

呂餘慶名胤當諱以字行祖充父琦見五代載記餘慶以齒補千牛備身歷開封參軍遷戶曹掾晉少帝命重啓領忠武節度以爲推官仕漢濮州錄事參軍顯德中宋太祖領同州節制聞其材奏爲從事累除定國軍掌書記知其爲人重厚簡易自歷滑許宋三鎮並爲賓僚及禪位由宋毫觀察判官名拜給事中充端明殿學士琦於清泰中亦居是官時人榮之未幾知開封征潞及揚並副上都留守建隆三年遷戶部侍郎母憂服除當荆湖平出知潭與襄州遷兵部侍郎知江陵召還餘慶本與趙



善李處耘同起龍潛元佐二人皆先貴願恬不爲意及處耘請  
涇州上問事之委曲徐度以理辨釋上以爲實廷命以本官參  
知政事蜀平心知成都府事值王全斌等不能戡下有軍校被  
酒持刃奪門人物立捕斬以徇軍中畏服民得按堵就加吏部  
侍郎兼劔南荆南等道都提舉三司水陸發運使開寶六年與  
宰相普更知政事印會普因忤旨左右爭傾之餘慶獨爲辨明  
時稱長者旋以疾表求解攻拜尙書左丞堯年五十贈侍中鎮  
南軍節度使

沈倫初名義倫以諱省字順儀太康入少習三禮於嵩洛間講  
學自給漢乾祐中白文珂鎮陝住依之與宣徽使咎居問善薦  
辟宋太祖同州幕府繼署滑許宋三鎮從事留後財貨以介  
聞太祖受禪名爲戶部郎中奉使吳越歸奏便宜屬揚泗間餓

長吏言郡中軍儲尙百餘萬省陳腐儲以貸貧民至秋收新粟  
公私俱利朝論難之太祖以問倫對曰國家以至恩溥民自當  
感名和氣豈復慮意外耶上遽命發廩貸民建隆三年遷給事  
中明年爲陝西轉運使王師伐蜀改隨軍水陸運使諸將入成  
都競取玉帛子女倫獨寓僧舍潔躬糲食有獻珍異者峻拒之  
東歸纔圖書數卷充篋而已上知之擢爲戶部侍郎樞密副使  
親征太原領大內都部署權留司三司事倫居第素庫處之晏  
如時權要多冒市秦隴巨木倫亦嘗爲母營佛舍因奏其事上  
笑曰爾非踰矩者知其未葺第遣中使按圖督工大爲治之倫  
私告使者願得規裁毋廣使者以聞上亦不逆其意開寶二年  
內艱起復六年拜中書侍郎平章事集賢殿大學士兼提舉荆  
南劔南水陸發運事秀祀西洛以倫爲東京留守兼大內都部

署俄召赴行在令預大禮太宗初加右僕射兼門下侍郎有事  
太原復留守判開封府事師還論功加左僕射五年監修太祖  
實錄成賜襲衣金帶六年加開府儀同三司以疾請告明年坐  
與盧多遜同列不能覺察責降工部尚書落子繼宗職未幾致  
仕上念倫舊臣命復繼宗官以慰其心薨年七十九贈侍中諡  
恭惠爲人清介醇謹好釋氏信因果嘗盛夏不避蚊蚋歲飢假  
鄉人粟盡焚其券徵時娶閻氏無子妾田氏生繼宗及貴閻以  
封邑固讓田乃爲閻治第太康田遂爲正室世多非之 繼宗  
字世卿蔭補西頭供奉官加朝散大夫知浚儀縣轉屯田郎中  
至道末領淮南轉運有疾以將作監致仕東封起厓太僕光祿  
二少卿判三司勾院卒年五十六女爲真宗貴妃三子惟溫至  
祕書丞惟清內殿丞制惟恭將作監簿

盧多遜懷州河內人曾祖得一祖貞啓皆縣令父億字子元少  
篤學以孝悌聞舉明經調新鄉簿秩滿補校書郎集賢校理晉  
天福中遷著作佐郎出爲鄆州觀察支使以清介自持景延廣  
留守西洛表爲判官時國用窘乏延廣務侵畧民財助軍增爲  
三十七萬億諫而止漢初授魏王承訓開封推官值侍衛諸軍  
驕恣負鹽入都門闕者不敢執反誣平民言於漢祖釋之周初  
爲侍御史大理奏兵亂法書亡失詔億重寫律令格式議定舊  
本及晉漢周初事分二卷爲大周續編敕詔行之俄知雜事加  
左司員外主客度支郎中兼弘文館直學士宋初遷少府監以  
其子當制懇求避位多遜顯德初登第解褐秘書郎歷集賢校  
理修撰左拾遺建隆中知制誥遷祠部員外郎乾德中知貢舉  
加兵部郎中史館修撰判館事開寶二年征太原知行府事務

幸常山又權知鎮州師還直學士院三年復知貢舉爲翰林學士六年使江南言李煜可圖狀同修五代史遷中書舍人參知政事外艱起復詔專修時政記金陵平加吏部侍郎太宗初拜中書侍郎平章事從平太原論功加兵部尙書爲人博涉經史聰明強力文辭敏給好任智數有謀畧多奇中太祖晚好讀書每取書史館多遙預戒吏先白已輒過夕閱覽遇上問書中事應答無滯同列皆伏焉素與趙普不協因名對多攻其短普

子承宗娶燕國長公主女詔許就闕成婚普由河陽入未踰月白遣之普憤怒上書白愬上悟留示宗京師未幾復普相位多遜心不自安普諷令引退復貪固權位不能裁決會遣堂吏趙白交通秦王廷美事聞責授兵部尙書尋以屬吏下詔暴其罪削奪官爵贈蔭仍籍其產親屬並配流崖州普親已上隸邊遠

州郡未幾卒於流所年五十二詔近徙容州遷移荆南端拱初錄其子雍爲公安簿遷其塋產初億有操行儉素恬退自奉甚約見多遜驟貴顯賜賚優厚服用奢侈愀然不樂因語所親吾家世儒素一旦富貴暴至吾未知稅駕之所也後果敗人服其識多遜累世墓在河南未敗前一夕震電盡焚其墓木蓋先兆云咸平五年復錄子寬襄州叅軍寮中景德進士授州掾祥符三年始奉喪歸葬襄陽又錄其孫玄爲司士

册曰守道蒙福忌嫉致辜締觀宋始薛呂沈盧

宋琪字叔寶幽州薊人少通書史與同縣宋雄齊名人稱二宋登遼進士晉天福中署壽安王侍讀屢辟趙延壽及于贊從事從至京師乾德四年拜左補闕太宗尹開封琪爲推官初甚禮遇琪數出入宰相趙普樞密李崇矩門下太宗惡之乃白太祖

出知龍州改開州開寶九年除護國軍節度判官太平興國初  
召赴闕時程羽賈瑛自府邸攀附躐致顯要琪不爲下故抑之  
久不得調三年授太子洗馬名見詰責琪拜謝請悔過自新遷  
太常丞出知大通監五年名歸將加擢用多遷阻之改都官郎  
中山知廣州將行復以藩邸舊僚留判三司勾院與三司使王  
仁贍廷辨事忤旨責授兵部員外郎會初置各府通判令判開  
封府事八年擢右諫議大夫同判三司三月改左兼叅知政事  
及李昉叅政又遷刑部尙書普出鎮拜平章政事歲中四遷實  
爲異數上嘗語以人君不可因喜怒爲賞罰世之治亂實由於  
此雍熙初上幸景龍門觀水碓因語侍臣此水出於山源清冷  
甘美故餘潤所及凡近河水味皆甘琪對曰亦猶人之善惡以  
染習而成也上爲醒然郊恩進門下侍郎昭文館大學士上嘗

言君臣之際。要在情通。在昔帝王。多以崇高自處。顏色嚴毅。左右無敢言者。厥與卿等周旋。欵曲商確。時事蓋欲通上下之情。無有壅蔽。自今直道而行。勿得有所顧避。琪對曰。易之否泰。正謂其然。臣等敢不傾竭。以副聖慮。未幾。以忤上意。罷守本官。先是。推官王澣引對雋爽。上許授朝官。琪執不從例。除七寺丞。上特批改右贊善大夫。又琪先娶馬仁瑀寡妻。乃轉運王延範親高繼沖女也。知廣州徐休復密奏。延範依附大臣所爲。不軌。琪未知狀。盛稱延範強明忠幹。上疑琪交通。然不欲顯暴。因以素奸。誣諧無大臣體罷之端。拱初耕籍田。進吏部尚書。將討幽薊。琪素究契丹種族。蕃部兵馬山川形勢。因上十策。曰。料賊衆寡。賊來布置。并備邊。命將排陣討伐。和蕃饋運。收幽州。滅契丹。各有經畫。復建明堂。辟雍之議。朝廷方討李繼遷。及西川賊帥。



李願又上書言頃任延州判官經涉五年將帥之事熟於間諜  
又任西川數年經歷江山備見形勢要害語多不錄上密寫其  
奏付軍中令將士擇利而行至道元年春預宴合光殿壽七十  
有九上慰撫久之退乃作多幸老民叙謂洪範五福已兼有之  
實天幸也二年拜右僕射月給實奉許五日一朝九月被病口  
占遺表而薨贈司空諡惠安爲人有文學頗涉諧捷在政府三  
十年周知人情尤通吏術凡遇百執事有所求請多而折之以  
是取怨於人子貽序右贊善大夫貽庶大理評事貽廣童子出  
身孫宗諒試秘書郎雄仕契丹爲應州從事至觀察判官雍  
熙三年王師北伐與飾度副使艾正以城降授正本州觀察使  
雄同知州事歷鴻臚充祿二少卿將作監丞所至職務修舉公  
私倚任願涉文史善談論有氣節士流多推許之卒年七十六

子可久爲奉禮郎

李昉字明遠涇州饒陽人祖溫封太子太傅父昶晉工部郎中  
集賢學士未有子昉母謝氏方娠指腹謂叔母張曰生男當以  
與母昉因繼迨爲子初補齋郎爲太子校書登洪乾祐進士授  
秘書郎馮道引直弘文館改右拾遺集賢修撰顯德中李穀征  
淮南辟爲記室軍中草奏辭理明白世宗覽而愛之及見相國  
寺文英院集昉與扈蒙崔頌劉昫實儼趙逢所遇益善之特加  
稱賞師還擢主客員外郎知制誥集賢殿直學士史館修撰俄  
爲屯田郎中翰林學士恭帝賜金紫宋初加中書舍人建隆三  
年罷爲給事中平湖湘詔祀南嶽就知衡州代歸陶穀誣爲所  
親求京畿令上怒出爲彰武行軍司馬居延州將爲生業以老  
三歲宮內徒不願宰相薦可大用開寶二年名還復中書舍人

未幾直學士院預宴大明殿坐多遜下上令真拜學士遂居其上六年知貢舉鄉人武濟川奏其用情取舍左遷太常少卿判國子監明年復官翰林學士判吏部銓普與多遜構上以問昉對曰非臣所知太宗卽位轉戶部侍郎同修左祖實錄從征太原駕次常山過其故里賜羊酒俾召公侯宴飲凡里中父老皆與遊者咸預焉七日而罷人以爲榮師還拜工部尙書兼承旨改文明殿學士時求宿舊無踰之者遂命叅知政事拜平章事復修時政記先進御而後付有司自昉始雍熙元年郊進中書侍郎會討幽薊不利遣使分詣河南籍民爲兵昉奏方春所至點募有妨農作人情不安須少緩布衣覆馬周諮之謂當北方有事不爲邊備徒知賦詩宴樂屬籍田禮畢詔加切責罷爲右僕射賈黃中言僕射百僚師長今自工部尙書而遷非所以責

之若文昌務簡以均勞逸爲辭斯爲得體上然之會邊警詔羣臣進策備禦防復引漢唐故事深以屈已修好弭兵息民爲言時論稱之淳化二年復平章事監修國史值旱待罪兼遭內憂求解機務明年以特進司空致仕慶會祀饗皆預倣洛中故事爲尤老會至道元年上觀燈乾元樓召防賜坐酌御樽飲之時京師繁盛上指前朝坊巷省署言晉漢君臣昏闇在闇善良其時人不聊生雖欲爲樂其可得乎防奏今四海清晏民康物阜皆陛下恭勤所致前事臣所備經何可並語上曰勤政憂民帝王常事朕固不以繁華爲樂惟以民安爲福爾因顧侍臣稱其小心循謹兩入中書未嘗有傷人害物之事宜其所享如此與詔命三十餘年勞役思慮致病心悸後益加畏慎卒以善終堯年七十二贈司徒謚文正防居官無赫赫稱有求進者雖知其

林正色拒之已而擢用或不見用必溫顏美語待之人問故答曰用賢人主之事必使恩歸於上不可輕受其謝以市私恩若不用者既失所望又無善辭取怨之道也爲文慕白居易淺近易曉好接賓客篤於故舊和厚多恕不念舊惡與盧多遜善嘗爲解釋上以多遜居嘗毀助待之益重又厚張洎而薄張洎及罷相洎草制詆毀必期望必詣助或以問必曰我爲廷尉李公方秉政未嘗一有請求此吾所以重之與晉相崧同宗里居稱東西李家及崧被誅子璨尙淹冗職特爲伸雪授著作佐郎終右贊善大夫人皆稱爲善人君子所生父與超俱贈太子太師祖母權莒國母張謝鄰國俱太夫人有文集五十卷及與劉溫叟所定開寶通禮二百卷子四宗海右贊善大夫宗諒主客員外宗訥字大辨初蔭補齊郎諱選吏部選光範意其年少令

賦六韻詩立就授秘書正字復善楷隸上居藩時每有篇詠冷  
昉屬和皆宗訥繕寫凡數百章卽位擢國子監丞雍熙初改秘  
書丞歷太常博士頗習典禮淳化中呂端引同判禮院終比部  
郎中年五十五子昭迥屯田員外郎昭迥太子中舍宗諤字  
昌武七歲能文恥爲藍官登進士授校書郎集賢校理同修起居  
注請復後苑陪宴不許京官乘馬入禁門遂爲故事真宗卽  
位拜起居舍人預修太宗實錄從幸大名疏言國家取邊之術  
制勝之謀將帥短長兵衛衆寡廟謨宸筭盡在吾術中自古行  
師首擇將帥隨材任使凡守一郡控一城分領驍勇爭據要害  
豈直三路主帥之名能制六師生死之命乎今車駕親征曾不  
聞出一丁一騎爲之救助不知浚溝高壘秣馬厲兵欲安用哉  
臣以爲臨軍易帥拔卒爲將正在此時有功者拔於朝不用者

戮於市。惟陛下圖之。遷知制誥。判集賢院。纂西垣制。集刻名氏於石。故事。兩省與臺司不相統攝。嘗平牒御史臺中丞呂文仲移文詰之。宗諤執引八事往復。再三奏聞。卒如其議。景德二年。拜翰林學士。上問清華之地。前賢歎歷多有故事。卿父子必周知。因著翰林雜記。以上平居究心典禮。凡創制損益。靡不與聞。兼素曉音律。將郊。命判太常大樂鼓吹二署。悉加審定。修完器具。條上利病二十事。樂工謬濫。幸以年勞遷補。至有抱器而不知聲者。奏斥五十餘人。更署職名。帝省閱賞歎。事具樂志。又著樂纂以獻。命付史館。時諸神祠壇多闕外墮。因設塹列樹以表之。館作契丹使自郊勞至飲餞。皆刊定其儀。又修皇親故事。武舉武選入官資叙。闕門儀制。臣僚導從。貢院條貫。多所裁正。從封泰山。改工部郎中爲同修昭應宮使。祀汾陰。后土爲經度制。

置副使禮成優拜右諫議大夫年四十九以疾卒帝甚傷悼詔  
宰相曰國朝將相宗惟昉與曹彬家能以聲名自立不墜門閥  
宗諤方期大用不幸短命沒可惜也爲人風流儒雅內行純至  
享繼母符氏并二寡嫂及孤恩禮頗盡與弟友愛覃恩必先羣  
從顧己子尙有未仕者嘗侍宴玉宸殿上稱其至孝族類多  
長幼雍睦朕嗣守二聖基業亦如卿之保門戶也復勅接士類  
無賢不肖恂恂盡禮獎拔後進惟恐不及士人皆歸仰之素工  
隸書有文集六十卷內書三十卷 孫昭述字仲祖以蔭任校  
書郎召試賜進士出身爲刑部詳覆官歷秘書丞羣牧制置使  
以太常博士知開封縣遷屯田員外郎京府推官入領三班院  
以翰林侍讀學士知鄭州未幾知通進銀臺司累遷尙書右丞  
祿享致齋得暴疾卒贈禮部尙書諡恪李氏居京城北崇慶里



凡七世不異。與至昭述稍自豐殖爲族人所望。然家法亦不廢。從孫昭遊字逢吉。蔭除將作主簿。幼時出拜楊億命爲賦。旣成億曰：「桂林之下必無雜木，非虛語也。」試授館閣校勘，收集賢校理，復爲鹽鐵判官，遷直史館，進直龍圖閣，集賢殿修撰，改工部郎中，歷知鳳翔河中二府，擢天章閣待制，徙鄭州卒。性和易，不忤物，能守家法。

呂蒙正字聖功，河南人。祖夢奇，戶部侍郎。父龜圖起居，即與母劉氏不睦。幼時同母被出，頗淪蹟，困乏後登進士第一，授將作監丞，通判昇州，代還授著作郎，直史館，歷左拾遺，補闕，知制誥，遂迎二親同堂，異室奉養，備至。遷都官郎中，入爲翰林學士，擢左諫議大夫，參知政事，賜第麗景門，爲人質厚，有重望，以正道自持，遇事敢言。初入朝堂，遇有朝士指之曰：「此子亦參政耶？」蒙

正陽爲不聞而過同列不能平命詰姓名遽止之曰若知其名則終身不能忘不若不知之爲愈也時皆服其雅量助罷拜中書侍郎兼戶部尚書同平章事監修國史每論時政有未當者必固稱不可上嘉其無隱蒙正以後進與普並相普雅推重之會當蔭子奏曰天下才能老於巖穴不霑寸祿者多臣忝及第釋褐止授九品京官今臣男始離襁褓若效前相多遜子雍起家卽投水部員外習以爲常恐繼陰譴乞以臣釋褐郎官補之自是定制宰相子止授九品京官有欲求知者自言所藏古鏡能照百里因以爲獻顧而笑曰吾面曾不盈咫雖照百里將安施哉聞者歎服張紳知蔡州坐賊免或言紳非真犯賊特蒙正貧時勾索不如意今報之爾上遂命復紳官蒙正不辯後考課院得實狀復命黜紳蒙正亦不謝俄坐妻族宋抗上疏忤旨罷

爲吏部尙書淳化四年復相因論征伐上曰朕比來爲民除暴  
苟好功黷武則天地神人燬亡盡矣對曰隋唐數十年中四征  
遼碣人不堪命卒無所濟治國之要在內修政事苟遠人歸心  
自致安靜又因李順亂言於上曰昔楚莊小國常懼無災今升  
平之代遠方忽有狂寇意者天垂警戒上避之上元待宴上語  
以五代生靈凋喪周祖自鄴南歸士庶皆罹剝掠下則火災上  
則彗孛觀者恐懼謂無復太平之日矣朕覽庶政萬事粗理每  
念上天之貺故此繁盛乃知理亂在人蒙正避席謝曰乘輿所  
在士庶走集故繁盛如此自都城外不數里饑寒而死者甚衆  
願陛下視近以及遠蒼生之幸也上變色不言同列多其直諫  
又欲遣使朔方諭中書選才蒙正退以名上不許他日三問三  
以其人對上曰卿何執也對曰臣非執特陛下未諒爾臣不欲

用。媿道妄。聽人主意以善國。聊同列悚息。上退謂左右曰。蒙正氣量。我不如。旣而卒。用所薦。果稱職。至道初。以右僕射出判河南。兼西京留守。上數遣中貴將命至待之。如在位時。多引親舊。與爲歡宴。政尙寬簡。委任僚屬。事多總裁而已。真宗卽位。進左僕射。會營泰熙陵。追感先朝不次之遇。奉家財以助經費。葬日。伏哭盡哀。人謂得大臣體。咸平四年。復同平章事。加昭文館大學士。國朝凡三入相者。惟普與蒙正耳。郊禮成。加司空。兼門下侍郎。六年。辭疾罷爲太子太師。封萊國公。後改隨許二國。景德二年。表請歸洛。陛辭日。肩輿至東闕門。命太子掖以升。殿言。遠人請和。弭兵省事。古今上策。願自今以百姓爲念。上嘉納之。至洛。子孫環列。迭奉壽觴。怡然自得。祥符中。車駕兩幸其第。錫賚甚厚。堯年六十八。贈中書令。諡文穆。六子從簡。太子洗馬。惟簡

太子中舍承簡司門員外郎中簡比部員外務簡國子博士知  
簡右贊善大夫二弟俱進士蒙休至殿中丞蒙異虞部員外郎  
慶曆中居簡由殿中丞提刑京東貸妖人孔直溫黨與不肯發  
石介墓遷鹽鐵判官拜集賢學士歷知梓州應天府荆南進龍  
圖閣直學士知廣州轉兵部侍郎判西京御史臺卒年七十二  
冊曰世際太平羣材競秀珙起幕僚助推耆舊貸厚如臣  
曷論先後三相始終宮貴康壽